



UNIVERZITET U ZENICI

**PRAVILNIK
O ORGANIZOVANJU I FUNKCONISANJU SLUŽBE ZA RHB
(RADIOLOŠKO-HEMIJSKO-BIOLOŠKU)
ZAŠTITU**

Zenica, decembar 2008.godine

Na osnovu člana 22. Pravilnika o organizovanju službi zaštite i spašavanja i jedinica civilne zaštite, njihovim poslovima i načinu rada („Sl. novine F BiH“, br. 77/06), člana 4. stav 1. tačka a) i člana 6. stav 1. tačka a) Uredbe o organizovanju službi zaštite i spašavanja u Zeničko-dobojskom kantonu („Sl. novine Ze-Do Kantona“, br. 7/08) i člana 246. stav 1. tačka 1. Pravila Univerziteta u Zenici, Upravni odbor Univerziteta u Zenici na svojoj 5. sjednici održanoj dana 12.12.2008. godine, donio je

PRAVILNIK

o organizovanju i funkcionisanju Službe za RHB (radiološko-hemijsko-biološku) zaštitu

I OSNOVNE ODREDBE

Član 1.

Ovim Pravilnikom organizira se Služba za RHB (radiološko-hemijsko-biološku) zaštitu (u daljem tekstu: Služba) u O.J. Metalurški institut „Kemal Kapetanović“ Zenica Univerziteta u Zenici, uređuje njena nadležnost i upotreba Službe, način opremanja materijalno-tehničkim sredstvima i opremom (u daljem tekstu: MTS i oprema) i obučavanje pripadnika Službe.

II ORGANIZACIJA I SASTAV SLUŽBE

Član 2.

U skladu sa članom 4. i 6. Uredbe o organizovanju službi zaštite i spašavanja u Zeničko-dobojskom kantonu (u daljem tekstu: Uredba) Služba se organizuje u O.J. Metalurški institut „Kemal Kapetanović“ Zenica Univerziteta u Zenici (u daljem tekstu: O.J. Metalurški institut) sa sjedištem u Zenici, ulica Travnička cesta broj 7.

Služba ima 8 (osam) pripadnika i rukovodioca Službe.

Sastav i kvalifikaciona struktura Službe utvrdiće se posebnim rješenjem koje će donijeti Rektor Univerziteta u Zenici.

Služba se popunjava zaposlenicima O. J. Metalurški institut slijedećih stručnih naziva i zanimanja: dipl.inž.hemije, dipl.inž.tehnologije, dipl.fizičar, dipl.biolog, dipl.inž.mašinstva, hemijski tehničar, mašinski tehničar i operator hemijsko tehnoloških procesa.

Član 3.

Rektor Univerziteta donijet će pojedinačna rješenja o imenovanju rukovodioca Službe i pripadnika Službe, u roku od 8 (osam) dana od dana stupanja na snagu ovog Pravilnika.

Rješenje iz stava 1. ovog člana sadrži slijedeće podatke: ime i prezime i ime jednog od roditelja; dan, mjesec i godinu rođenja; mjesto rođenja; adresu stanovanja; naziv pozicije na koju se raspoređuje u okviru Službe; naziv završene škole; vrsta poslova za koje je osposobljen za rad u okviru Službe i osnovne zadatke koje će obavljati u okviru Službe.

Član 4.

Rukovodilac Službe rukovodi Službom, organizira i obezbjeđuje obavljanje ovih poslova iz nadležnosti Službe utvrđenih u ovom pravilniku, a u fazi spašavanja obezbjeđuje provođenje naredbi Kantonalnog štaba civilne zaštite.

Rukovodilac Službe za svoj rad i rad Službe odgovoran je direktoru O. J. Metalurški institut.

III NADLEŽNOST SLUŽBE

Član 5.

Služba poslove iz svoje nadležnosti vrši u fazi nastanka prirodne ili druge nesreće i u fazi otklanjanja i saniranja nastalih posljedica, a zadatke u funkciji preventivne zaštite ostvaruje u okviru obavljanja redovne djelatnosti u O.J. Metalurški institut.

Član 6.

Služba vrši operativne mjere zaštite i spašavanja koje se odnose na zaštitu i spašavanje ljudi i materijalnih dobara od RHB agenasa na pogođenom području i to:

- a) U fazi spašavanja:
- Preduzima mjere da nadležni organ unutrašnjih poslova izvrši blokiranje svih prilaznih puteva i da udalji sva lica iz zone opasnosti i da vrši reguliranje saobraćaja u toj zoni;
 - Vršiti izvlačenje i dekontaminaciju povrijeđenih i oboljelih ljudi i ugroženih materijalnih dobara;
 - Organizira pružanje prve pomoći i iznošenje povrijeđenih ljudi iz ugrožene zone i vrši njihov transport do najbliže zdravstvene ustanove;
 - Pravovremeno obavještava građane o nastanku nesreće i mjerama koje treba preduzimati na zaštiti ljudi i materijalnih dobara;
 - Preduzima mjere na ličnoj i kolektivnoj zaštiti povrijeđenog, oboljelog i ugroženog stanovništva RHB agensima;
 - Vršiti evakuaciju građana sa područja ugroženog RHB sredstvima;
 - Organizira aktivnosti na gašenju požara i spašavanju zatrpanih ljudi iz ruševina;
 - Stalno prati i utvrđuje vrste i stepen kontaminata, kao i meteo-uvjete i kretanje kontaminata i o tome obavještava stanovništvo i vrši asanaciju kontaminiranog područja.
- b) U fazi otklanjanja posljedica
- Angažira se na RHB zaštiti i dekontaminaciji ljudi, životinja, objekata, materijalnih dobara i zemljišta i traži da nadležni štab CZ naredi angažiranje dodatnih stručnjaka za RHB zaštitu i potrebnih materijalno-tehničkih sredstava;
 - Utvrđuje obim posljedica koje su nastale djelovanjem RHB sredstava;
 - Vršiti dezinfekciju, dezinsekciju i deratizaciju na pogođenom području.

Član 7.

O.J.Metalurški institut će u okviru svoje redovne djelatnosti planirati i redovno provoditi sve mjere preventivne zaštite utvrđene u članu 7. Uredbe i članu 6. i 32. Pravilnika o organizovanju službi zaštite i spašavanja i jedinica civilne zaštite, njihovim poslovima i načinu rada.

Član 8.

Naredba Kantonalnog štaba civilne zaštite dostavlja se rukovodiocu Službe koji je dužan pravovremeno obezbijediti postupanje Službe za izvršenje zadataka utvrđenog u naredbi.

Član 9.

Procedure o načinu djelovanja i postupcima Službe u slučaju nastanka prirodne ili druge nesreće donijet će direktor O.J. Metalurški institut na prijedlog rukovodioca Službe iz člana 4. stav 1. ovog pravilnika.

Član 10.

U cilju izvršavanja poslova i zadataka iz nadležnosti Službe, tokom prirodnih i drugih nesreća, sva MTS i oprema, te kapaciteti sa kojima raspolaže O.J. Metalurški institut stavljaju se na raspolaganje Službi.

Služba se oprema MTS i opremom sa kojima raspolaže O.J. Metalurški institut, te MTS i opremom koja se bude nabavila preko Kantonalne uprave civilne zaštite kroz Program razvoja zaštite i spašavanja Zeničko-dobojskog kantona.

Član 11.

Materijalnu formaciju Službe utvrdit će direktor O.J. Metalurški institut na prijedlog rukovodioca Službe iz člana 4. stav 1. ovog pravilnika.

Član 12.

Pripadnici Službe dužni su obučavati se i osposobljavati za izvršavanje poslova i zadataka iz člana 5. ovog pravilnika.

Obučavanje i osposobljavanje iz stava 1. ovog člana vrši se kroz redovno obučavanje u okviru O.J. Metalurški institut, odnosno kroz učešće na seminarima i kursovima te radionicama i vježbama koje se organizuju u inostranstvu i u Bosni i Hercegovini.

IV ZAVRŠNE ODREDBE

Član 13.

Ovaj Pravilnik stupa na snagu narednog dana od dana objavljivanja na oglasnoj ploči Univerziteta.

Pravilnik se može mijenjati i dopunjavati na način i po postupku utvrđenom za njegovo donošenje.

Tumačenje ovog Pravilnika daje Upravni odbor Univerziteta.

Broj:01-101-702-1495/08

Zenica, 12.12.2008. godine

**PREDSJEDNIK UPRAVNOG
ODBORA UNIVERZITETA**

Prof.dr.sc.Kemal Subašić